


# Für di da

text: padi bernhard musik: dave demuth



a jedem morge, wenn du ufschtasch und wenn du go schlafe gahsch  
jede tag, wo du no vor dier hesch und jedi schtund, wo üs no bliibt

uf jedem wäg, wo du no gahsch a jedem ort, wo du wirsch si  
a dem punkt, wo du nümm wiiterchunnsch  
bis denn, wo du alles verschtahsch

denn, wenn du nümm weisch, wo's duregahd  
denn, wenn alles zunderobsi schtahd...

**denn bini da, denn bini da, für di da**

wenn du gihsch, fan ich dich uf, ich beschütz dich, wenn du tröimsch  
du treisch mi dur die guete zyte, i de schlächte träg ich dich

i jedem schpiel, wo du verlüürsch, bi jedem sieg, wo du dier holsch  
i jedem lied, won ich dier sing, bisch du de sinn i jedem ding

denn, wenn du nümm weisch, wo's duregahd  
denn, wenn alles zunderobsi schtahd

**denn bini da, für di da, denn bini da, für di da**  
**denn bini da, wenn du nümm weisch, wie's gahd**  
**für di da, 365 täg im jahr**  
**ich bi da, ich bi da für dich**  
**für di da, ich bi da, immer da**  
**ich bi da, wenn du e fründ bruchsch**  
**für di da, wenn du en uswäg suechsch**  
**denn bini da, wenn du nümm weisch, wo d'bisch**  
**da für dich, wenn du eleigä bisch...**

# Nordwind

text & musik: padi bernhard/mash/dave demuth



mier sind sit langem underwäx  
hend vil xeh und vil erläbt  
mier mached vorwärts, lueged sälte zrugg  
chömed guet dur jede schturm

alles schiint unändlich liecht  
s'gahd scho lang nur no graduus  
doch bim nächschte zwüschehalt ziend mer andri saite uf

**chumm mier riited mit em nordwind übers land gäge d'sunnesiite zue  
& det chlauet mier e insle mit mne bootsstäg & liiged irgendwie am meer  
und denn blast us de nordwind heiweh dur üsi wilde haar  
und de machemer üs startklar, sägled hert am wind zrugg is heimatland**


mier packed glägeheit bim schopf  
fahred die nächshti usfahrt drab  
mier mischled üs chli under d'lüüt  
und chömed um die halbi wält

alles schiint so eifach z'sii  
es git kei afang und keis änd  
mier triibed schwärelos im stärneschiff dur d'umlaufbahn

**chumm mier riited mit em nordwind übers land gäge d'sunnesiite zue  
& det chlauet mier e insle mit mne bootsstäg & liiged irgendwie am meer  
und denn blast us de nordwind heiweh dur üsi wilde haar  
und de machemer üs startklar, sägled hert am wind zrugg is heimatland**

# Eine wie mich

text & musik: padi bernhard/mash



es mag guet und gäre si, dass au ich nur eso wie jede ander bi  
du seisch ich sigi nid vill besser, defür aber au nid schlächter  
und mängisch sogar haargenau wie du

ich bi durtriibe wie ne windhund chraze kurve ohni grund  
doch wenn's druf achunnt, lah di nid im stich

**eine wie mich – muesch nid erfinde**  
**eine wie mich – git's nid überall**  
**eine wie mich – wirsch du niemals me finde**  
**eine wie mich – de git's nid für all**  
**eine wie mich – git's nume einisch**  
**eine wie mich – git's nur für dich**

ich has no gärn, wenn's mal hudled, wenni nid muess dussä si  
und am liebschtä wäri überall debii  
ha vo tweets, no vo beats, no vo boxe e ahnig  
doch drüber rede - das chönnt au ich


ich bi de, wo nur zur not lügt, mache jede blödsinn mit  
und wenn's druf achunnt, bini für di da

**eine wie mich – muesch nid erfinde**  
**eine wie mich – git's nid überall**  
**eine wie mich – wirsch du niemals me finde**  
**eine wie mich – de git's nid für all**  
**eine wie mich – git's nume einisch**  
**eine wie mich – git's nur für dich**

**eine wie ich – de findt im läbe nie me**  
**eini wie dich – di git's nur für mich**

# Bisch parat

musig: denis deschenaux/mash text: padi bernhard



du nimmsch locker jedi hürde, und schpilsch chli mitem glück  
du bisch hüt hie und morn scho nümme da, fahsch gärn chli alles a

ohni flügel, ohni uffangnetz erklimmsch du s'gipfelchrüz  
& egal wie zäch & schträng das wird, s'muess immer wiiter gah

au wenn du dier ganz sicher bisch  
s'lauft trotzdem nid nach plan  
es git nüd wo ewig wiitergahd oder immer so isch gsi  
was wüchlich wichtig isch  
muesch nid erscht morn afah  
legg dich is züüg, teil d'charte us und spill so guet wie d'chasch


**s'fahd a – muesch nümme warte**  
**s'fahd a – mier legged los**  
**pack dini chance am chrage & setz alles wo du hesch**  
**tanz mitem bär, deck d'charte uf**  
**s'läbä fahd jetzt a – säg, bisch parat**

du wellsch di uf das schpili iilah  
ohni z'wüsse, was der blüeht  
s'bringt nüd, wenn zwill schtudiersch  
s'gahd nur, wenn's usprobiersch

ohni regle, ohni schützehilf  
ganz elei im friie fall  
muesch mängisch mit em chopf dur d'wand  
s'liit nur sälte uf de hand

# De lanis halt la si

text: padi bernhard musik: dave demuth



jede abig im mim bett, dänki, das ich ja scho wett  
chönnt vorem schaffe schnell go jogge gah

ich la jetzt s'süesse la si & la s'bier und de wy  
tranier so lang bis ich es wöschbrett ha

im grund gno wüsstis ja scho, s'wär guet so  
doch s'isch halt churzerhand öppis dezwüsche cho  
und wenis rächt überlegg, chas no chli warte, cha ja au am abig no starte

**de lanis halt la si, de lanis la bliibe,  
s'isch gliich, s'isch nid so wichtig gsi  
has wüekli probiert, ha welle drabliibe  
a mier liit's nid, s'hed no nid sölle si**

bring s'gäld uf d'bank, wirde rank und schlank  
ich gwöhn mer villicht hüt no s'rauche ab

ich laufe d'stäge duruf, gibä nümm so schnell uf  
und wens mal sträng wird, mach ich nid eifach schlapp


im grund gno wüsstis ja scho, s'wär guet so  
doch s'isch halt churzerhand öppis dezwüsche cho  
und wenis rächt überlegg, cha's ja no warte, cha ja au morn no starte

## Refrain

im grund gno wüsst mes ja scho, s'wär besser so  
doch mängisch cha scho mal öppis dezwüsche cho  
und wemmes rächt überleit, chönnt me zwar starte  
me chönnt aber au bis übermorn warte

# Wemmer zämä sind

text & musik: padi bernhard/denis deschenaux



mier zwe chönd si ohni zrede, wüsst mängisch gärn, was du denn dänksch  
s'git drum so viel, woni no nid vo der weiss

bisch wienes meer, bisch mis rettigsboot, au weni schtrandä ohni dich,  
würsch mi go sueche, wenn ich verloorä ga

irgendwie isch es fantastisch und irgendwie einzigartig  
nur mit dier isch alles so wunderbar liecht

**wie du mich aluegsch – wemmer zämä sind  
und wie du lachsch – wemmer zämä sind  
wie du mich gärn hesch wieni bi – wemmer zämä sind**

**und wenn du dänksch – wemmer zämä sind  
das ich nid weiss – wer mier zämä sind  
und rund um üs git's nüd wo no wichtig isch – wemmer zämä sind**

es git so täg, da tauchi lieber ab oder flüüg mit dier devo  
und wenn du schlafsch, ligg ich grad näbä dier


äs git nüd, wo hüt bedeutend wär, du bisch de ort, woni wett si  
ich bi froh, dass du mi alltag wordä bisch

irgendwie isch es fantastisch und irgendwie einzigartig  
und es tuet guet, wenn du zu mier seisch

## Refrain

# Gliich wie mier

text: padi bernhard musig: dave demuth



de kuno sitzt a de bar & trifft e schöni - mit schöne, länge haar  
und au bim büne wird nadisna miss dolly bird zur ludmilla  
am hofer sini rosmarie hed stress mit de melanie  
d'frau küenzi isch es bitzli schtier & d'rosalie ghört nid zu mier

de flöru liebt sini julia  
oder d'romana, d'gabi, d'barbara - d'sarah, d'susi, d'cécile u d'tanja

**sie verschänked ihres hätz - springed nackt i see  
sind füür und flamme, chömed zugg zu dier  
sie wend dich küsse, alles wüsse & vergässed was isch gscheh  
s'gahd ne gliich wie mier bi dier**

de stärn macht ganz vil chind mit dere, wo de ritschi hübsch findt  
d'jene lahd de trummer wieder mal elei, wil de baschi bringt sie hüt am abig hei  
de jan tröimt vo de lisa, doch die cha jetzt en hecht ha  
de gölä hätt vill blöder ta, de trauffer will annina-na-na-na

de marc liebt d'severina  
& de sidi abdel assar stahd uf d'tochter vom mustafa vo el hama


**sie verschänked ihres hätz, springed nackt i see  
sie haued mit dier ab und fünd ganz nöi a  
sie wend dich küsse, alles wüsse & vergässed was isch gscheh  
sie maled dich scharlachrot a**

**sie schänked ihres hätz, riited wiisi schimmel  
sind füür und flamme, chömed zugg zu dier  
sie holed dier de mond und jede stärn vom himmel  
s'gahd ne gliich wie mier bi dier**

*chum beweg di meitschi, äntlech es lied mau nume für di (für di)  
chum beweg di meitschi, sones lied das gib der nur einisch, verschteisch das?*

# Äs isch eso

musig: dave demuth text: padi bernhard



sie seid: früsch gwagt isch scho halb gwunnä, doch halb voll isch au halb läär  
was nid sig, chöng ja no wärdä & jede afang isch halt schwär

er meint: swird nüd eso heiss gässä wie's koched wordä isch  
s'git gid gliich jede si sänf dezue & was de buur nid kännt - das frisst er nid

**ja, ja, äs isch eso - und so isch's nämli guet**  
**äs isch, wie's isch, es bliibt, wie's isch - äs muess wiitergah**  
**ja, ja, es isch eso - äs chunnt scho guet**  
**s'wird sich niemals ändre, s'chunnt & gahd**

er seid: wer zletscht lacht, lacht am beschtä und de gschiider, de git na  
was me nid weiss, das chame lernä & wer nid will, de hed scho gha ....

sie meint: nur s'gueti chunnt vo obä, doch s'beschte chunnt am schluss  
doch wer spat chunnt, de straft s'läbä, ene mene mu... – und du bisch duss

**ja, ja, äs isch eso - und so isch's nämli guet**  
**äs isch, wie's isch, es bliibt, wie's isch - äs muess wiitergah**  
**ja, ja, es isch eso - äs chunnt scho guet**  
**äs wird sich niemals ändre...**

so sitzeds visavis im bus, redet anenand verbii  
er nickt und luegt zum fänschter us, sie findt: schad, cha's nümm so si


so wie denn, vor vilne jahr, sie vermisst's halt scho e chli  
sie hend sich so vil z'sägä gha, wo sie no jung sind gsi

wer raschtet, fahd a roschte & wer schtahbliibt, schtahd im wäg  
nur wärt isch, was tued choschte & s'gäb nüd, wos no nid gäb...



# Vo vore a

musik: michael gertschen text: padi bernhard



d'woge sind glättet, s'gröbschtä isch verbii  
alles gsehd hüt andersch us  
mer hend üs total verrännt und de fade verloore gha  
langsam begriff ich, was so guet söll gsi si dra

ich vermiss di nümm, bisch jetzt en teil vo mier  
und öb du's glaubsch oder nid, ich hang noch chli a dier

**chumm mier fünd nomal vo vore a – lönd alles hinder üs  
dänked nümm zrug a geschter & au nid a morn  
s'cha doch gar nid si, dass alls  
nid guet isch gsi si und falls  
isch äs längschtens alt & grau**


mier sind so jung gsi, hättet alles chönne ha  
hend welle z'vorderscht vore stah  
denn hed de wind dreiht und mier hend fahrt ufgno  
irgendwie simmer irgendwo under d'räder cho

ich vermiss di zyt, wo mier zwe no hend zämä gha  
und ich glaube fasch, du hangsch au no chli dra

**chumm mier fünd nomal vo vore a – lönd alles hinder üs  
dänked nümm zrug a geschter & au no nid a morn  
s'cha doch gar nid si, dass alls  
nid guet isch gsi si und falls  
isch äs längschtens alt & grau**

# Ewigi Liäbi

text & musig: padi bernhard & dave demuth



nimm mich i arm & drück mich fescht a dich & la mi nummä los  
ich tanke mich grad a dier uf, will's eifach so guet tued  
ich ha di gärn, ich bruchä dich ja, ich bi süchtig nach diär  
doch garantiä chan ich diär keini Gä, dass es für immer so wird si

**ewigi liäbi - das wünsch ich diär**  
**ewigi liäbi - das wünsch ich miär**  
**ewigi liäbi - numä für üs zwei**  
**ewigi liäbi - föhl mich bi dier dehäi**

säg nid für immer & säg nid niä ich gibä alles für dich uf  
di blick hed igschlagä i mis härz hesch mich zum brännä bracht  
troffä vo dem schtromstoss, wo so guet tued, würdi alles machä  
alles Gä, alles für dich tuä ich la dich nümmä los


**ewigi liäbi - das wünsch ich diär**  
**ewigi liäbi - das wünsch ich miär**  
**ewigi liäbi - numä für üs zwei**  
**ewigi liäbi - föhl mich bi dier dehäi**

ich weiss, liäbi chunnt & gad wiene cherzä schmelzt sie wäg  
ja, wienäs lied hört sie eifach uf oder sie haut eifach ab  
niemmer seid, es sigi liecht es isch es einzigs gäh & näh  
s'git kei verlüürer oder gwünner i dem würfelspiel

**ewigi liäbi - das wünsch ich diär**  
**ewigi liäbi - das wünsch ich miär**  
**ewigi liäbi - numä für üs zwei**  
**ewigi liäbi - föhl mich bi dier dehäi**

# S'letschte Lied

text & musig: padi bernhard



ich ha der mini lieder gschänkt, ich ha mit dier zyt verbacht  
du hesch a mich - wie ich a dich dänkt, hesch mich is schwitze bracht

du hesch mer zueglost, hesch mi berührt, ha dier vo mier verzelt  
ich ha dich und du hesch mich verführt, hesch mer kei frage gstellt

**das wär's jetzt gsi - jetzt isch's verbii**  
**au wenn nid immer alles guet oder perfekt isch gsi**  
**jetzt isch's verbii - das wär's jetzt gsi**  
**das hie isch s'letschte lied für dich und mich**  
**denn isch's verbii**

du hesch mich zum tänzer gmacht, ich ha dich i d'arme gno  
du hesch mich zum troime bracht, ich bi froh, bisch zue mer cho

und wenn's au niemmer interessiert, das hie ghört nur üs elei  
das isch allerletschte lied & ich hoff, du nimmsch es hei

**das wär's jetzt gsi - jetzt isch's verbii**  
**au wenn nid immer alles guet oder perfekt isch gsi**  
**jetzt isch's verbii - das wär's jetzt gsi**  
**das hie isch s'letschte lied für dich und mich**  
**denn isch's verbii**

alles wo mal afahd  
gahd irgendeinisch z'änd  
au falls no irgendöppis aschtahd  
liits nümm i üsne händ